

Planisà novs meds d'instrucziun per las scolas

La regenza grischuna ha approvà il concept per elavurar la «fibla», il cudesch per emprender a leger ed a sriver en rumantsch grischun. Il concept prevesa d'elavurar ina fibla dal tuttafatg nova. Quella vala sco med d'instrucziun il pli impurtant per la 1. classa primara. L'elavuraziun sa basa sin il concept general «rumantsch grischun en scola» che la regenza ha approvà ils 21 da december 2004. La nova fibla duai star a disposiziun a partir da l'avust 2007 per il diever en las 1. classas da las regiuns da pionier.

A medem temp ha la regenza approvà da realisar il concept «tudestg per Rumantschas e per Rumantschs» per las 4. fin las 6. classas primaras. Cunquei che la dumonda da las linguas ch'è da preschent actuala (cumenzament da l'instrucziun da la segunda lingua/anglais tempriv) n'è betg anc sclerida, è la cumissiun per meds d'instrucziun da l'avis ch'i na saja betg raschunaivel d'elavurar in agen med d'instrucziun nov. Empè da quai prevesa il nov concept d'eruir e da recumandar meds d'instrucziun adequats per duas gruppas da pretensiun (tudestg a partir da la 1. classa, tudestg a partir da la 4. classa). La finala ha la regenza approvà l'elavuraziun d'in med d'instrucziun per l'enconuschientscha da la patria per las 4. fin las 6. classas en rumantsch grischun, en tudestg ed en talian.

Il nov concept permetta da surpiagliar parts d'in med d'instrucziun existent en licenza e senza midadas, da l'adattar a las relaziuns grischunas u d'al remplazzar dal tuttafatg tras temas ch'èn pli adattads e pli impurtants per il Grischun. Il med d'instrucziun duai daventar in «cudesch da cultura» ch'exprima la multifariadad dal chantun.